



Sadowa, bosc di Swiep (Prussie), ai 3 di Lui dal 1866

Mari mê,

jo no soi bon di scrivi e vô no savês lei, ma se mai us rivaran chestis cuatri riis, cualchidun us judarà come che achì une anime buine mi jude me.

No ài sielzût jo di quartâ cheste gabane, ni di vignî a scombati in chest paîs forest, ma no pues tirâmi indaûr.

No soi bessôl in spiete di saltâ fûr des cisis par lâ al assalt.

Pal moment o soi vîf, ma tant che spi di forment sot il burlaç... e chi no'nd ài ulîf benedet di brusâ par cuietâlu.

Preait par me che o puedi tornâ a cjase ta la polse dal fogolâr, dulà che o vôres jessi e stâ simpri cun vô.

No ài plui timp, mi tocje lâ.

Vuestri fi Agnul

di Maghe Olstrele

Angelo Cossaro

contadin, nassût a Sant Andrât dal Cormôr l'11 Zenâr 1841, al è stât un dai passe 50.000 fants, lombarts, trentins, venits e furlans, des trupis asburgichis al timp dal Risorziment talian. Al è muart a 25 agns in Prussie, te ultime bataie de Tierze Vuere di Indipendence, cuant che il paîs todesc, aleât cu la pene nassude Italie Sabaudie, al à frontât e batût l'Imperi dai Asburcs. Ta chei timps il Comun di Talmassons al jere sot la Austrie che, dopo la scunfite, e à cedût il teritori a Napoleon che lu à passât al Ream d'Italie. Agnul al è stât soterât intune fuesse comun in tiere foreste: no si sa di precîs dulà. Tal so paîs, il so non nol è scrit in nissune lapide, nissun monument, nissune viuce. Dome il Regjistri anagrafic comunâl dal 1871 al prove la sô esistence. Ma a Flumignan, i dissidents a teginin une vore di cont la sô medaie di arint "DER TAPFERKEIT" (il valôr), onôr che il Kaiser Checco Bepo al tributave ai erois.